

ENYAM JOSEPH ENỌ AKA EGYPT

Genesis 37:1-36

ỌYỌHỌ UKPEP-ŊKPỌ 33

Eke Mkpawara

IKỌ IBUOT: “Ema mme asua mbufo, onyūn enam ufọn enọ mmọ eke esuade mbufo” (Luke 6:27).

Joseph, Ekpri Eyen-Eren

Joseph edi kiet ke otu mmọ emi enemde owo ndikot mbaña emi ewetde esin ke Edisana Nwede Abasi. Ewet ke ediwak ibuo nwe ebaña edu-uwem ye mme edinam esie, mme andiwet inyūn itīnke idiok ndomo kiet idian edu-uwem esie. David ekedi owo eke ekekemde esit ye Abasi, edi ama odu mme ini mmem-idem esie; Moses ama ekeme ndikpuhore ekikere Abasi, oto ke ọkpọsọn akam, edi ama odu ini eke enye mikenemke Abasi esit. Edi nnyin ikopke nkpo efen ibaña Joseph ibohoke se idide eti. Enye okodu uwem emi akananade ndo tutu edidem Egypt ọfiok ete ke spirit Abasi ama odu enye ke idem, onyūn ọdohọ ete “Owo ndomo kiet eke enyenede ikike ye ifiok nte afo ikoduhe.”

Kpukpru nditọ ete Joseph ema eson enye ke emana, ke mibohoke owo kiet, mmọ ekenyūn edu ke inwañ ekpeme-eron ye mme ufene eken. Nditọ-ete Joseph ikoduhe eti uwem nte enye, ndusuk ini enye esitiñ onọ ete esie abaña idiok uwem mmọ. Abasi iyomke nditọ esie edi “Mme obuk mbuk” mmọ emi efehede ebine mme ete mmọ ye ikpo mbuk ke abaña ekpri nkpo emi midighe akpan nkpo; edi edieke nnyin ikutde idiok-nkpo ke uwem nditọ ete iren ye iban emi ekpenode item ebaña, edi itie nnyin nditiñ nnọ mme ete ye eka nnyin. Edi edieke mmọ ekade hell koro ikawamde mmọ ndidip idiok-nkpo, mmọ ekeme ndinyan nnyin ubok ke usen ikpe nnyūn ndohọ nte “Afo ekedi Anditiene Christ; nso ikanam afo mukasuaha unọ nnyin?”

Eyen eke ekperede Abasi ke uwem esie, eyebọ nsahi ediwak ini. Ndusuk owo eyekot enye “edisana owo” me “oku Abasi,” me, mme enyīn efen eke anamde edu ukpono Abasi esie edi nkpo nsahi edi mmọ ema edu ke afanikon mmọ eyebine anditiene-Christ ekeyom unwam. Adaña didie ke idorenyin mmọ edikpa mfuhọ ke ini owo emi okotde idem-esie anditiene-Christ okpude Abasi ke isan esie ye Abasi.

Mme Ndap Joseph

Jacob ama ama Joseph akan nditọ ete esie eken koro Joseph ekedide eyen eren emi Rachel akamande, nko, enye ama odomo ndinem ete esie esit. Sia mmọ mbiba ekenamde nkpo enọ Abasi, emi ama anam mmọ ediana kiet, ukem nte mme anditiene-Christ ke akpanikọ edianade mfin. Nditọ ete Joseph ema efibe enye idiok ufup koro Jacob akamade enye akan mmọ; ndien ama ototim ọdiok akan ke ini Joseph akadabade ndap okut nte mme ebek nditọ ete esie enuhode enọ ebek esie. Mmọ ema ekabare ndap oro nte enende, ke mmọ ndikere nte ke oworo ke mmimọ idinyene ndinuhọ nnọ Joseph. Ndien ini ama odu emi mmọ ekedarade ndinuhọ nnọ enye.

Joseph ama afiak adaba ndap, ke ini enye emi, utin ye ọfiōn ema enuhọ enọ ntanta-ọfiōn esie, ndien Jacob ama obup, me imọ nko idinyene ndinuhọ nnọ ekpri eyen eren esie. Enye ama asua onọ Joseph koro enye ikoyomke enye okohore idem onyūn ebre odudu ye nditọ ete esie, okonyūn oyom enye odu ke idak edikara ete ye eka esie. Edi idem ama akpa Jacob abaña mme ndap oro. Enye ama ọfiok ete Joseph edi eyen Abasi, ndusuk enye okonyūn ekere ete ke Abasi okodomo ndiyarare nkpo mbe ke ekpri eyen oro.

Mme Nditọ-Ete Ibak

Jacob ama enyene akwa otu-eron ye ufene, ndien nditọ esie emi ekedide mme ekpeme-eron ekenyene ndisaña nka ọtọ mbiet odude, ndusuk ini, mmọ ekesinyene ndika anyan nkpon ufok. Tōnọ ke Shechem ka Hebron ekedi nkpo nte itiat aba ye duop me ata, ndien Jacob ama ekere eti-eti abaña nte nkpo etiede ye mmọ, ke ntre, enye ama ọdōn Joseph aka ekese mmọ, Joseph ama ọsop ndinyime nnọ ete esie, onyūn ọtōnọ ndika anyan usūn isan oro ikpon. Mme obio ikawakke ke usūn emi, akan oro mme idiōnọ emi etemere enye usūn ikoduhe, edi nte enye okosuk oyode ke inwañ emi ekperede Shechem, enye okosobo ye owo kiet emi okokutde nditọ ete esie, ndien owo emi ama etiñ onọ Joseph ete ke mmọ ema eka ke Dothan, nkpo nte itiat itaita ke iso. Ekpri Joseph ekenyene ndisaña ofuri anyan usūn oro nko, edi ke akpatre enye ama okut nditọ ete esie. Nte mmọ ema edara ndikut enye nnyūn nkop mbaña nte ufok etiede? Baba. Mbemiso enye asaña okosim mmọ, mmọ ema ediomi ndiwot enye. Mmọ ema eti mme ndap emi enye Joseph akadabade, ekenyūn edu ke iyaresit koro mmọ ekefehede ndik ete ke enye eyedikara mmimọ. Adaña didie ke idem akpakpa mmọ edieke mmọ ekpekemedede ndida nse ini iso, nnyūn nkeme ndikut Joseph ke itie ukara ye ubon ke okure edidem Egypt, andikara emi ikọ esie ekedide ibet. Akana enye enyene kpukpru ison mbio efen ye mme ufene mmọ ke mibohoke eke mme oku. Ke ini enye awatde ke ukpat-nkpo esie, mme isūn-utom ekenyene ndibem enye iso mfiori “Nnuk eron.” Idighe nditọ ete esie ikpon ekedi mmọ emi edinuhode enọ enye, edi kpukpru owo eke enye osobode.

Edi Joseph ekenyene ndibọ ufen mbemiso enye ọdọk osim itie ubọn esie. Ediwak ńkpọ edu ke uwem Joseph eke ebietde eke Christ. Jesus ama okut esuene ke isọn ye akwa ndutuhọ, ke akpatre usen Esie, edi sese, ubọn ke ini eriset Esie! Andikan mkpa, hell ye udi!

Joseph ikọfiokke edidiọn eke akanade ebet enye ke uwem esie ke ini iso, ndusuk ini, idem ama onyūn akpa enye ke abañā mme enyene-ndik ńkpọ oro ekesitibede enọ enye. Nditọ ete esie ekpekewot enye edieke Reuben mikpakanamke mkpe-ubọk ke ibuot esie. Reuben ekedi akpan, okonyūn edi itie esie ndinọ ete esie etop ete ke Joseph odu ke ifure. Enye ama ọnọ ekikere ete yak mmọ esin Joseph ke obube. Enye akaduak ndisio Joseph ke ini nditọ ete eken ema edaha, nnyūn nnọ enye ọnyọn ufọk.

Ke ema ekesin Joseph ke obube, nditọ ete esie esuhọre etie ndidia udia. Mmọ esọn esit eti-eti tutu mmọ ikakpaha aba ndikere mbañā idiok-ńkpọ mmọ, edi ke ukpep-ńkpọ ini iso, iyekut ite ke mmọ ikekemeke ndifre idiok edinam mmọ, ke akpatre, ekikere ama amia mmọ ufen eti-eti. Mme owo ekeme ndidomo ndifre mme idiok-ńkpọ mmọ, edi Abasi idiyakke. Ke ini eyen otutde utọn ke uyo ete ye eka esie, onyūn okut ndudue ke se enye anamde emi, oro ọwọrọ ete ke Abasi ke etiñ iko ọnọ enye ndinam enye ọfuhọ abañā idiok-ńkpọ esie.

Ke ini nditọ ete esie ekesuk ediade ńkpọ, mmọ ema ekut mbon Ishmael nte ewatde ke enyọn camel eka Egypt. Mmọ ekedi ikpọ mme anyam urua emi ekesidepde ńkpọ ke obio kiet emen ekenyam ke obio efen enyene udori. Ekese ini mmọ ekesimum mme owo ke ńkan-ubọk enyūn anyam nte ifin, ke ntre ke mmọ ekekeme ndinam ediwak okuk. Judah ama okut ufañ ọnọ nditọ ete esie ndinyam Joseph man ebọ okuk. Mmọ ema esọn esit tutu enana mbọm enọ Joseph ke ini edade enye edaha ke idak ọkpọsọn ndutuhọ koro enye akade esen idut emi oyomde usuñ ọkpọn mbon ima esie, ndidi ofin.

Reuben ikoduhe ikpere ke ini mmọ ekediomide ndinyam Joseph, ndien ke ini enye afiakde edika itie obube ndisio Joseph, idem ama akpa enye ndikut nte ke enye iduhe. Ekedi itie esie ndinọ ete esie mbuk mbañā uwem Joseph, enye ama ekere nte enye edikemedede ndida ke iso ete esie nnyūn ntiñ nnọ enye nte ke eyen ima esie ama osop.

Abiañā

Sia usuñ emi Joseph akasañade ọkọyọhọde ye mme ndiọi unam, okonyūn oyomde, ekedi mmem-mmem ọnọ nditọ ete esie ndibiañā ete mmọ onim ke akpanikọ ete ke idiok unam ama owot enye. Mmọ ema eda ọfọn-idem Joseph emi ekenyenede ediwak enyin emi mmọ ekefiokde ete ete mmọ eyediọnọ edebi ke iyip unam emi mmọ ekewotde, enyūn eda ekewut enye. Mmọ ikọdọhọke ite ke ema ewot Joseph, edi mmọ ekenam abiañā, emi ńko okosuk edide idiok. Ndusuk owo ekere ete edieke mmimọ midaha inua itiñ ikọ nsu, ke mmimọ inamke idiok; edi owo ekeme ndidu uwem abiañā onyūn enyene ubiom ikpe ke iso Abasi ukem nte owo okposude nsu. Abasi oyom nditọ Esie enam akpanikọ enyūn enen ke edinam ye ke ikọ.

Jacob ama ọfuhọ eti-eti ke ini enye mkekwe eyen esie; baba owo kiet ikekemeke ndidọn enye esit. Kpa ye emi, nditọ esie ikenyimeke ndiyarare idiok-ńkpọ mmọ. Emi owut nte owo ekemedede ndisọn esit ke ini enye ama ekesin ndikpañ utọn nnọ uyo Abasi.

MME MBUME

- 1 Nte Joseph ekedi ńkpri ńkan eyen eren?
- 2 Nso idi ntak emi enye ekedide eyen ima ọnọ ete esie?
- 3 Nso ke usua ye isinenyin nditọ ete Joseph akañwam mmọ ndinam ke akpatre?
- 4 Ekenyam Joseph ke mbak (silver) sidibe edip. Anie ke ekenyam ke mbak (silver) sidibe edip ye duop?
- 5 Ke nso oruk usuñ ke uwem Joseph ekebiet eke Jesus?